

生無生論親聞記

生無生論親聞記

與慈敬署



重印淨土生無生論親聞記序

南嶽讓云。生則決定生。去則實不去。洵哉是言也。夫吾人現前心性。圓括十虛。聖凡平等。性絕去來。體本無生。至若返妄歸真。則不妨無生中而論生。無去來中而論去來也。蓋以衆生逐妄不休。死生難息。若不定其方針。誰能獲其歸趣。是論之作。良有以也。明天台幽溪無盡燈祖力扶台宗。弘演教觀。融通淨土。傑作斯論。卽講於新昌大佛像前。感天樂鳴。空衆聞朗然。是知此論高契諸佛之意。遠逗衆生之機。然淨土一門。普被三根。此論玄詮。無不該統。其生也。所謂萬修萬人去。其無生也。所謂令無量衆生而入滅度。實無衆生入滅度者。何以故。衆生本佛。因迷有生。設悟自心。雖十萬億土之遙。便是舉足下足。無非淨土。但得現前心佛相應。念念卽得身證淨土。何娑婆相妄之所有。是以雖生本無生也。奈人自迷。而不知返。千賢萬聖。切教憶佛。念佛現前當來。必定見佛。金臂垂手。應緣而至。身到蓮臺。隨念而生。是雖無生。決定有

生也。達此二意。聲聲置身於淨土矣。然則斯論之義。可思議乎。時燈祖之嗣孫授教大師者。天機獨朗。親聆法音。隨聞隨錄。而釋論文。名曰親聞記。論義圓融。無以加矣。縱圓機深切。非疏無以入其奧。此記所以由述。堪爲深入經藏之一良導也。趙雲韶。沈祥麟。郭涵齋居士等。善達佛理。信願誠切。同輸蜻蚨。重印流通。普願若見若聞。發蓮花之堅誓。或利或鈍。脫塵世之幻軀。既蒙問序。不揣愚庸。爰贅是語。以弁於端云。辛未秋天台石梁比丘興慈敬撰

淨土生無生論親聞記序

記稱親聞者。表稟承非謬也。教髫年出家。卽隨師祖大和尚。往括蒼普慈寺。聽講圓覺。未聽此論。聯翩浹旬。爾時敷文極暢。闡義至精。座下聽衆。無有一人。若身若心生懈倦。而不開悟者。惟教神根既鈍。兼之童稚無知。若聾瞽觀場。不過隨人泣笑而已。既返幽溪。年齒漸進。而好樂之念日臻。非但數聽數承。兼復屢請屢問。隨聞隨記。散葉盈函。既無疑而不決。亦無義而不詳。苟不貫之集之。何以益人益己。若夫方言巧拙。可曰責在我躬。其於造詣精微。敢將質諸來哲。入門者。請徑升堂。而凜甘露。種種問橋。非所急也。

皇明天啓六年歲在丙寅春王正月天台山幽溪後學沙門受教下筆序

淨土生無生論序

昔楊次公云。贊輔彌陀教觀者。其書山積。唯天台智者大師十疑論。最爲首冠。寧詎知後次公六百許年。而更出我幽溪和尚。生無生論乎。括海藏以十門。融億刹於一念。廣古德之未備。闡今人所未聞。往生奧義。若指諸掌。蓋自其三昧流出。故不可得而思議。生今之世。獲覩是論。罔知猛省求生。豈不大可哀哉。發起之由。實始不慧。故亟圖剗劂。用布大慈。願戴髮含齒。盡未來際。普霑法乳。悉悟無生。至若讚是功德。則有十方恆沙諸佛。廣長舌在。毛道凡夫。聊序其大都爾。門人四明聞龍和南撰。

淨土生無生論親聞記卷上

幽溪法孫受教記

○解釋此論。科分爲三。初釋論題。

淨土生無生論

論題六字。義具三重能所。所謂能生所生。能融所融。能論所論也。初能生所生者。淨土二字爲所生。生之一字爲能生。所生淨土。卽從是西方過十萬億佛土。有世界名曰極樂。約其土體。具有四種。謂凡聖同居土。方便有餘土。實報莊嚴土。常寂光土。能生之人。卽娑婆世界。念佛衆生。體惟二種。一段身。二變易身。若分段生死之人。則四種淨土。皆可求生。若變易生死之人。則惟求生上之三土。或二土一土。如韋提希。本是凡夫。厭同居穢。欣同居淨。祇由隨聞十六妙觀。三惑一心頓破。卽於當座。悟無生忍。不惟分見實報。亦乃分證寂光。非分段身。可求生四土乎。故約分段。收機則廣。約變易。收機則狹。故我娑婆。具四土機。惟在進解與造行何如。

又此二種具四教機。及悠悠凡夫。雖具四教等。然皆回小向大。回偏向圓。總成一種圓頓之機。爾二能融所融者。淨土生三字爲所融。無生二字爲能融。謂以無生而融其生。以生而濟其無生。所謂理因事濟。雖一道不礙千差。事得理融。縱萬殊無離一性是也。蓋無生眞如之理。苟無四種淨土。與夫二種能生之機。則性具之理。終晦而不顯。然而雖知有是事矣。苟不知事全卽理。則四種淨土。與夫二種能生之機。終離而不融。是故圓頓行人。修淨土者。須以事而濟乎理。熾然求生。以理而融乎事。生卽無生。是則終日生。而未嘗外乎無生。終日無生。而不妨乎生。豈與夫尙理者。觸言而賓無。定謂無土可生。尙事者。觸言而宗有。定謂有土可生。可同年而語哉。三能論所論者。淨土生無生五字爲所論。論之一字爲能論。此論以析微爲宗。斷惑爲趣。析微則無理不彰。斷惑則無疑不破。可謂圓頓了義之指南。三身四土之心宗也。若以六字論廣狹者。淨土生三字。約事則狹。無生二字。約理則廣。又淨土生三字。事相繁多則廣。無生二字。理一則狹。今以事而濟乎理。理乃事

中之理。以理而融乎事。事乃理中之事。會而歸之。則非事非理。亦非廣非狹也。又淨土生無生五字。屬所詮理事。則廣論之一字。屬能詮文字。則狹。又論爲能詮。包含所詮義理。則廣。上五字。惟是所詮。所含則狹。若曰無離文字。以說解脫。卽文字以爲總持。則非能詮。非所詮。亦非廣非狹也。若以論題。往收十門。則各有攝屬。一眞法界門。則冠一論。而淨土生無生五字俱該。二身土緣起門。則淨土二字之事。三心土相卽門。四生佛不二門。亦淨土生無生俱該。五法界爲念。六境觀相吞。七三觀法爾。此之三門。則生無生三字。義兩攝屬。蓋爲念與境觀三觀。皆生字邊事。若夫法界與相吞法爾。則無生二字邊事也。第八感應任運。第九彼此恆一。第十現未互在。此之三門。亦兩攝屬。如感應彼此現未六字。則生與淨土三字邊事。若夫任運恆一互在。則無生二字邊事也。其不然者。則題目與論兩不相稱。何以契貫散二華。總別之妙哉。至於五重釋題。乃天台解經通軌。以之釋論。終帶牽強。况諸師業有私說。茲不繁用。大莊嚴論云。造論凡有五義。一者如金成器。令信解故。

二者如華開敷。開示彼故。三者如食美膳。得法味故。四者如解文字。令修習故。五者如開寶篋。實證得故。今亦具含五義。採集諸經。以成一論。如金成器也。論立十門。門詮衆妙。如華開敷也。理明性具。境會惟心。如食美膳也。既悟圓修。知土由心變。如解文字也。性中極樂。由修顯發。如開寶篋也。

○二釋作人。

天台山幽溪沙門傳燈著

大師字無盡。別號有門。三衢姑蔑人。出家天台。居智者幽溪道場。四十餘年。傳弘天台教觀。其所著述。有楞嚴玄義。圓通疏。前茅圓通疏。海印三昧。謂之楞嚴四書。又著淨名無我疏。彌陀圓中鈔。永嘉集。註般若融心論。性善惡論。幽溪文集等。今無生論是其一也。其生平履踐行實。具韓求仲太史所著高明寺碑。與教私記年譜。茲不備述。

○三釋正文。大師講此論時。已有分判。今依舊科。毫無所加。大科爲二。初皈命述。

意。二依義立論。初中三。初稽首三寶。三初兩土佛寶。

稽首能仁圓滿智無量壽覺大導師

菩薩造論弘經。必先皈命三寶者。有二意。一歸宗有在。知非臆說。二懇請冥加。不致紕謬。吾祖亦然。稽首卽皈命之義。蓋人之所重。莫大於命。命之所尊。莫大於首。今以最尊之首。稽叩於三寶足下。表我身命。無他所歸。獨歸於三寶之至尊也。能仁等者。此土教主。梵語釋迦牟尼。此云能仁寂默。能仁彰其用。寂默顯其體。今略稱能仁者。以寂默智在於默。今存智在於說。故云能仁。能仁是別號。通號有十。第十名佛。佛者覺也。亦智也。天台釋此有六種。卽今云圓滿智。乃究竟覺。然與衆生理性。無二無別。故觀經疏明理卽佛云。此是圓智。圓覺諸法。徧一切處。無不明了。法智大師云。此是者。指大經衆生卽佛等。皆是本性圓覺。非三般若融卽微妙。智不名圓。知一切法。一一含受一切諸法。全法是智。全智是法。待對斯絕。名圓覺。諸法云云。然則衆生雖具。無了因力。全以三智而爲三惑。惟佛與佛。乃能究盡諸法。

實相。邊際智滿。種覺果圓。是故稱佛爲圓滿智。無量壽覺。卽西土教主阿彌陀佛。此中已翻爲覺。故上以智代大導師者。法華疏具列四種。謂通途慈悲結緣。權實二智。若從踈泊親。今是二智。亦具上二種。能仁則折以權道。從娑婆此岸將導之。無量壽則攝以實道。從極樂彼岸接引之。又能仁示以卽實而權。無量壽示以卽權而實。故二世尊皆得稱圓滿智大導師。互存無在也。

○次兩土法寶。

所說安養大乘經了義了義至圓頓。

佛之度生。示以形聲二益。形則現身現通。聲則以說以默。上所皈命佛。以形益也。今所歸命法。以聲益也。或問說爲聲益可爾。默旣無言。何爲聲益。答曰。默爲無聲。乃說之待。令人得益。故亦聲益。所說安養大乘經。且就娑婆教法。說極樂世界事者爲言。義實含乎安養依正二報所宣之法。了義等者。讚佛所說淨土法門。乃卽權而實。卽實而權。其中義理。無不了了也。圓頓者。圓則圓滿具足。頓則卽心卽佛。

至圓頓者。謂圓頓之至也。應云圓頓中之圓頓。了義圓頓。皆重言之者。如華嚴法華。皆了義圓頓之教。而此二經。皆讚淨土往生法門。豈非了義中之了義。圓頓中之圓頓乎。如十念七日。專持名號。若得往生。便階不退。何有了義圓頓更過於此。慈雲大師所謂了義中之了義。大乘中之大乘是也。

○三兩土僧寶二。初菩薩僧。

妙德普賢觀自在。勢至清淨大海衆。

妙德等諸大菩薩名號。已翻梵爲華。若翻華爲梵。則妙德。梵語文殊。普賢。梵語祕輸。毘陀。觀自在。梵語婆婁吉佉。勢至。梵語摩訶那鉢。妙德普賢。則爲能仁左右輔弼。揚化弟子。觀音勢至。則爲無量壽左右輔弼。弟子。或在華嚴。或在法華。或在方等。如來宣說。清淨平等覺經。無量壽經。觀無量壽經。小彌陀經。鼓音王等經時。莫不磻椎相扣。主伴擊揚。以成淨佛國土之機。以攝往生清淨之衆。在此菩薩既爾。在彼大士亦然。譬如一主二臣。動靜必俱。至於清淨海衆。皆法門之先達。華池

之勝友。凡是西方僧寶。一一頂禮皈依。

○次聲聞僧。

問曰。此等諸師。亦大菩薩。云何以聲聞稱之。答曰。傳持佛法。現聲聞相故。以佛道聲。令一切聞故。

馬鳴龍樹及天親。此土廬山蓮社祖。天台智者并法智。古往今來弘法師。

馬鳴菩薩。卽西天第十二祖。著起信論。發明繫念西方。最爲切要。龍樹菩薩。西天第十四祖。南天竺人。於九旬內。誦通三藏。深入法忍。造大悲方便論。大無畏論。又著十住婆沙智度論等。多讚西方。勸人念佛。有偈云。若人願作佛。心念阿彌陀。卽得爲現身。故我皈命禮。一家宗之爲始祖云。天親菩薩。北天竺人。造唯識金剛般若等論。仍著無量壽論。有求生淨土偈。及五門修法。蓮社祖者。蓮社祖有七。初祖晉慧遠法師。俗賈氏。雁門人。學通儒老。年二十餘。見道安法師。因聽講般若。豁然開悟。乃曰。九流異議。皆糠粃耳。後入廬山。刺史桓伊。創東林居焉。影不出山者。三

十餘年。每送客遊履。常以虎溪爲界。時息心緇侶。絕塵信士。不期而至。望風遙集。共一百二十三人。結爲蓮社。名跡尤著者。一十八人。六時禮誦。精進不退。十年三覲聖相。後般若臺定起。見彌陀佛。身滿虛空。圓光之中。有諸化佛。觀音勢至。侍立左右。又見水流光明。分十四支。流注上下。演說苦空。佛告遠曰。我以本願力故。來安慰汝。汝後七日。當生我國。後七日果終。有雜文十卷。號廬山集。盛行於世。事詳本傳。文繁不錄。此土念佛實始於遠。故稱爲初祖焉。二祖長安善導。光明法師。三祖南岳承遠。般舟法師。四祖長安法照。五會法師。五祖新定少康。臺巖法師。六祖永明延壽。智覺法師。七祖昭慶省常。圓淨法師。智者大師。諱智顗。華容人。俗姓陳氏。生時靈瑞不一。七歲入果願寺。聞誦法華普門品。忽自憶記。宛如夙習。十五歲禮佛像。誓志出家。十八薙落。二十進受具戒。天嘉元年。謁光州大蘇山慧思禪師。事詳本傳。今不具錄。嘗著十六觀經疏。并十疑論。後於剡東石城彌勒像前。令弟子唱十六觀經名。誠衆曰。四十八願莊嚴淨土。香臺寶樹。易往無人。火車相現。一

念改悔者。尙得往生。况戒定熏修。聖力道行。終不唐捐。言訖。趺坐而化。法智大師。諱知禮。字約言。金姓。四明人。從寶雲通公。傳天台教觀。出世承天。繼住延慶。戶外屢滿。嘗行法華般舟三昧。期生安養。後與十僧結社。約修懺三年。自焚其身。決取淨土。楊文公億再三勸留。始允其請。著妙宗鈔。以釋觀經義疏。人至于今。咸受其賜。古往今來。弘法師者。古往卽過去。諸大耆宿等。今卽現在。諸大知識等。來卽當來。紹繼宗風者。凡有一句一偈。贊及西方者。悉皆皈依也。

○次皈命求加。

我今皈命禮三寶。求乞冥加發神識。

皈命求加。以發神識。則所論者。方上契佛心。中合祖意。可以下度含識。楞嚴經云。若有決定發菩提心。受持此咒者。此諸金剛藏王。精心陰速。發彼神識云云是也。

○三述造論意。

敬採經論秘密旨。闡揚淨土生無生。普使將來悟此門。斷疑生

信階不退

此論所明淨土。生卽無生。生化兩冥之旨。皆吾祖敬探經論。所詮秘密之道。毫無臆說。然於經則旨在言表。於論則旨在詮中。觀其所用。則觀經疏。妙宗鈔。其義居多。要知惟心淨土。本性彌陀之理。非天台性具宗旨不明。非吾祖深契祖心不悟。是則四明。可謂深契佛祖之心宗。吾祖可謂妙悟法智之骨髓也。將來讀此論。而悟此宗者。尙何深疑之不斷。何圓信之不生。何不退之不階哉。

○次依義立論二。初總列十門。

將造此論。立爲十門。一眞法界門。二身土緣起門。三心土相卽門。四生佛不二門。五法界爲念門。六境觀相吞門。七三觀法爾門。八感應任運門。九彼此恆一門。十現未互在門。

問曰。今此十門。幾迷幾悟。幾事幾理。幾因幾果。答曰。一眞法界。非迷非悟。身土緣